



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Enchiridion Theologiæ Pastoralis Et Doctrinæ Necessariæ Sacerdotibvs Cvram Animarum administrantibus**

**Binsfeld, Peter**

**Avgvstæ Trevirorvm, 1609**

V. Quomodo se ipse comparabit, & cum fructu alios iuuabit.

**urn:nbn:de:hbz:466:1-40721**

os in suam sententiam rapiat, qui sibi primum  
persuaserit, quod ab alijs extorquere nititur.

Neque vero minus studium est adhibendū  
in ijs quæ dicenda non sunt, quam in ijs, quæ  
dicenda videbuntur, Verba itaque de re con-  
trouersa, & graui expendat, ne quid excidat  
imprudenti, quod cum Scholastica pugnet  
Theologia. Et si forte humanitus, vt fit, ali-  
quod verbum imprudenter excidisset, aut  
sententia, quæ in malum sensum rapi posset,  
& periculose sonet; statim ipse, priusquam ad  
alia pergat, perspicue explicet necesse est: ne  
quod scandalum, aut offendiculum, quasi fe-  
cius de religione sentiat Concionator, in au-  
ditorum animis relinquatur: nam, vt Prophe-  
ta ait, *Eloquia Domini, eloquia casta.*

*Psal. 116.*

## CAPVT V.

*QUOMODO SE IPSE COM-  
parabit, & cum fructu alios  
iuuabit.*

**M**A TER, vt lacte nutriat infantem, se a-  
lit primum, curatque valetudinem, &  
solidos cibos mandit, quos in infantis os inge-  
rit. Ad eundem modum Concionator, vt spi-  
ritualē escam populo, quem filiorū loco habet  
commode præbeat, prius ipse cibum mandet,

Zz 2 vt

vt sic in os infantis ingerat. Quare sacrificet, pie, oret, ieiunet, vigilet, lacrymetur, flagellis se verberet, corpusque pœnitētia subigat spiritui, & domet. Sic fiet, vt peccata, quibus tanquam à dæmonibus multi occupantur, citius

*Matth. 17.* expellat; nam, vt CHRISTVS ait, *Hoc genus demoniorum non eijcitur, nisi per orationem, & ieiunium.*

*Ioan. 17.*

In precando DEVM, eiusdem Domini exemplum imitetur, qui cum ad cœlestem Patrem properaret, sic orabat: *Pater, cum essem cum eis, ego seruabam eos in nomine tuo; nunc autem ad te venio, serua eos, &c.* His tanquam commendatijs litteris, quas nobis vita abiens reliquit, vt ad DEVM Patrem oportet, qui eas preces, haud dubie, libenter accipiet.

Angelorum quoque subsidium imploret, à Seraphinis quidem amorem petat, à Cherubinis scientiam, & lumen; de ceteris Hierarchijs sua dona postulet, quæ à DEO acceperunt. Præcipue vero ab Angelo custode auditorum potestatem sibi fieri postulet, docēdi eos, tanquam discipulos, qui eius sunt custodiæ commissi. Pudori quoq; sit eos docere ausum, qui tales nacti sint & magistros & custodes. Quorum si disciplina nihil profecerunt, quomodo tua, qui imperitus sis, & peccator, doctrina proficient? Roga item, vt inspirando ea suppleant, quæ in te desiderantur, vel ob imperitiam, vel negligentiam tuam; vel denique ne ab Angelo tuo illud audias, *Medice, cura te ipsum.*

*sum*: ipse serua, quam fers legem, & fac ipse prior, quod iubes. Sic ex concionibus vtile quid hauries animæ tuę commodo. Da itaque operam, vt boni magistri officio fungaris, re ipsa exequendo, quæ doces: vt de cœlesti illo Doctore accepimus, qui *capit primum facere, Actor. i.* quam *docere.*

Cum aliquam virtutem persuadere studiose cupis, eius Sancti auxilium implora, qui in ea excellit, dum in terris versaretur. Exempli causa, de Patientia verba faciens, commendate, tuaque D. Iobo: si de Pœnitentia ages, Magdalenam appella: si de Continētia, & Castitate, Iosephum: si de Caritate, eum discipulum, quem dilexit IESVS: vt horum apud DEVM intercessione singulas illorum virtutes consequaris, & meritis per DEI misericordiam, vt cum fructu populus & verbum DEI simul audiat, & custodiat.

Verum cum ambitionis æstus oppugnare, atque vtinam ne expugnare concionantes soleat præsertim si audientium frequens sit concursus: armet se ipse, pugnetque cum hoste illo, qui viperæ instar cor ipsum, & sanguinem bonum, tanquam veneno corrumpere solet. Huic malo hoc esto remedium. Suggestum concensurus, verecundia ducatur, & pudore; quasi palinodiam canere pergat, & quæ dixit, retractare sit iussus. Re vera enim, si recta remuneratione expendas, hoc agis, dum virtutem lau-

das, atque commendas; retractas ea, & reuocas, quæ turpiter antea peccando commisisti, cum toties DEVM offendebas. Se itaque, suaque opera accuset, & damnet; ipse sibi præco sit, & carnifex. Quæ cum ita sint, quid, ò infelix cinis, si publice palinodiã canis, teq; retractas, superbis? si tuam ipse vitam condemnas, cur extolleris? Triduo ante concionem studiũ sit obsequi tribus Trinitatis personis: primo die DEO Patri memoriam commenda, postero die Filio intellectum, tertio die Spiritui sancto offer voluntatem. Si quid forte memoria excidet. Patrem cœlestem appella, si alicuius loci difficilis explanationem, vel arcanum aliquid sacræ Scripturæ inuestigas, ad Filium confuge; cum te aridum, & sine deuotione comperies, roga Spiritum sanctũ, vt sui amoris ignem in corde tuo accendat: vt sic omnes animæ potentia instrumenti loco sint DEO acceptæ, quo illis bene ad illius laudem, & gloriam vtaris.

---

## CAPVT VI.

### SVGGESTVM ASCENSVRV quid agendum?

**C**ONCENSVRVS ad dicendum animi puritatem in primis curet, & puræ conscientia examina adhibeat, tanquam mox habitabit